

Mungu Ananijali

Usiogope, kwa maana mimi ni pamoja nawe; usifadhaike, kwa maana mimi ni Mungu wako; nitakutia nguvu, naam, nitakusaidia, naam, nitakushika kwa mkono wa kuume wa haki yangu—**Isaya 41:10.**

Bwana yu katika mawasiliano hai na kila sehemu ya milki Yake kubwa. Anaoneshwa akijishusha kuielekea dunia na wakazi wake. Anasikiliza kila neno linalotamkwa. Anasikia kila kilio; Anasikiliza kila ombi; Anaangalia kwa makini mienendo ya kila mtu....

Mungu daima amekuwa akiwaangalia na kuwatunza watu Wake.... Yesu aliwafundisha wanafunzi Wake kwamba kiasi cha umakini wa Mungu kinachotolewa kwa kusudi lo lote kinalingana na kiwango kilichotolewa katika uumbaji wa Mungu. Alielekeza fikra zao kwa ndege wa angani. Alisema, hakuna shomoro anayeanguka chini bila Baba yetu wa mbinguni kujua. Na ikiwa shomoro mdogo anajaliwa Naye hivyo, hakika roho za wale ambao Kristo alikufa kwa ajili yao ni za thamani machoni Pake. Thamani ya mwanadamu, makadirio ambayo Mungu anaweka juu yake, yanafunuliwa katika msalaba wa Kalvari....

Rehema na upendo wa Mungu kwa jamii iliyoanguka havijaacha kuongezeka, wala havijakoma kuwaelekea watu Wake duniani.

Ni kweli kwamba maudhi yatakuja; tunapaswa kutarajia dhiki; lakini tunapaswa kuweka kila kitu, kikubwa na kidogo, kwa Mungu. Yeye hashangazwi na wingi wa malalamiko yetu, wala hashindwi na uzito wa mizigo yetu. Uangalizi Wake kwa kanisa unaendelea mpaka kwa kila kaya, na humzunguka kila mtu; Anajali katika shughuli zetu zote na huzuni zetu. Anazingatia kila chozi; Anaguswa na hisia za udhaifu wetu. Mateso na majaribu yote yanayotupata hapa yanaruhusiwa, ili kutimiza makusudi ya upendo Wake kwetu—"ili tuweze kuwa washirika wa utakatifu Wake," na hivyo kuwa washiriki katika ule utimilifu wa furaha unaopatikana katika uwepo Wake.